

# !Tsínharhi!



**12 AMBE ENGA UÉTARHIJKA  
PARAKA FAMILIA MA  
SÊSI IREKAAKA**

Para MÉXICO KA CENTROAMÉRICA  
Congregación Cristiana  
de los Testigos de Jehová, A.R.  
Apartado Postal 895  
06002 Ciudad de México  
México

Exentaakajtsi lista ma iámindu  
direksionicha jingoni ixú  
[www.jw.org/tsz/nena-karani-o-uandani](http://www.jw.org/tsz/nena-karani-o-uandani).

## 12 ambe enga uétarhijka paraka familia ma sési irekaaka

Íási uánikua familiechaksí xerekuarhexati, peru ¿andiksísi máru seguriini jaki májku k'éri jarhani? ¿Ambe jarhuataa-síni?

- Estados Unidos, uéxurhini 1990 ka 2015 jimbo ísi, ima k'uiripuecha engaksí jukari 50 jatiriika, tsimani xanhari-ksí sánderu diborsiarikuarhisti ka imeecha engaksí jukari 65 jatirikia tanimu xanhari sánderu.
- Máru k'uiripuecha engaksí familiecheeri ambe exejka, uandasíndiksí eska uétarhisínga iámu ambe jimbo sési arhiani sapiicha, joperu máteruechaksí uandasíndi eska uétarhisínga xukaani ka ataani. Taatiichaksí nóte-ru mítestia ambe úni.
- Engaksí tumbiicha na k'érajkia, nóksí mítesíndi ambe úni paraksí úni orhepani uérani.

Joperu i ambe uaati méntku ménderueni:

- Temungurhiri ma uaati tsípikua jingoni irekani ka para méntkisi.
- Taatiichaksí uaati jorhenguarhini uékperakua jingoni jorhendaani uájeechani.
- Tumbiichaksí uaati responsabliini engaksí na k'éraakia.

¿Ambe jarhuataaxaki familiechani paraksí sési irekani? I rebista ¡Tsínharhi! arhiatiksíni 12 ambe paraka familia ma sési irekaaka.

# AMBE ENGA JATAKA

## PARA TEMUNGURHIRIICHA

Jarhuajperata 1 Kompromisu

Jarhuajperata 2 Jarhuajperani

Jarhuajperata 3 Janhanharperani

Jarhuajperata 4 Puátsperantani



## PARA TAATIICHA

Jarhuajperata 5 Uandontskuarheni  
sapiicha jingoni

Jarhuajperata 6 Jurhimberantaani  
sapiichani

Jarhuajperata 7 Ambakiti jánguechani  
jorhendaani

Jarhuajperata 8 Ambakiti ejemplu  
íntspini



## PARA TUMBIICHA

Jarhuajperata 9 Miteni neeskiri t'u

Jarhuajperata 10 Mintsinharhikueni

Jarhuajperata 11 Ánchikuarhiriini

Jarhuajperata 12 Jatsikukuarhiani  
meteechani



# 1 KOMPROMISU

## ¿AMBE ARHIKUEKASĪNI?

Temungurhiriicha engaksī ísī exejka temungurhiri-kuani komu kompromisu ma, nóksī uékasīndi jurajperani ka i ambe úsīndi eskaksī seguru p'ikuarharaaka. Tsimarhanksī seguru jarhasīndi eskaksī no méni jurajperaaka ambe uéjki úkuarhini.

Máru temungurhiriichaksī no jurajperasīndi jim-bokaksī imeecheri familia ka amiguechaksī no jurajkuasīnga paraksī ísī úni. Joperu sánderu sésiisti eskaksī no jurajperaaka jimbokaksī uékperasīnga ka janhanharperani.

**BIBLIERI KARAKATA:** “Acheeti asī chútantee imeeri uarhiitini” (1 Korintu 7:11).

“Engari miántajka eskari kompromisu ma jatsiska, nóri sóntku no sési exesīnga ambe ma. Ístu, sánderu fásiliisīndi puátspentani ka kurhajkuarhini eskaksīni puáchentaaka ka no ísī exeani problemechani komu ambe ma engajtsī jimbo úpiringa diborsiarikuarhini” (Micah).

## ¿ANDISĪ JUKAPARHAKUE?

Engaksī temungurhiriicha no kompromisu jingoni p'ikuarharaaka, jiáni enga problema ambe jauaka, úpirindiksī eratseni eskaksī no terukusīnga ka jurajperanksī uékani.

“Uánikua k'uiripuechaksī tembuperasīndi eratseparini eska engaksī no uaaka sési pájperani uaakaksī diborsiarikuarhini. Engajtsī ísī eratseparini uambuchaska o tembuchani, jiájkantsī no ma kompromisu jingoni tembuperaska” (Jean).

## ¿AMBEJTSĪ UAA ÚNI?

### EXE JE NA ENGAJTSĪ JÁSĪIKA

¿Ambejtsī úsīni engajtsī chaari acheeti o uarhiiti jingoni arhirperajka?

- ¿P'amondakuarhisīntsī engajtsī uámbuchaka o tembuchani?



Ísī eska ankla ma na p'íngujka barkuni ma para no támisī nirani, kompromisu úsīndi eskaksī temungurhiriicha uaa-ka orhepani uérani.

- ¿Eratsesīntsī nénajtsī irekapirini máteru nema jingoni?
- ¿Uandasīntsī arini ambe: “jurajkuakakini” o “máteru nemani jirinhakuarhintaakia engareni jukaparharaaka”?

Engajtsī uandaska eska jo ma ísī i kurhamarhikuecheeri, jánguarhintsī je sánderu kompromisu jingoni p'ikuarherani.

## IIRI AMBE UANDONTSKUARHI JE TEMUNGURHIRI

- ¿Andichisī nóteru ísī exejka juchaari temungurhirikuani eska kompromisu ma?
- ¿Ambechi uaa úni parachi sánderu kompromisu jingoni exeni juchaari temungurhirikuani?

## KONSEJUECHA

- Karaku je ménichanisī chaari acheetini o uarhiitini parajtsī arhini na engajtsī xáni uékajka.
- Jatsia je chaari acheetiiri o uarhiitiiri fotuechani jima engajtsī ánichikuarhijka.
- Pauani pauani uandajpa je chaari uarhiitini o acheetini engajtsī ánichikuarhitarhu jauaka o engajtsī no máрку jauaka.

**BIBLIERI KARAKATA:** “Imeechani enga Diosī kúndaaka, asī nema jáme jarhangutaantani” (Mateu 19:6).



## 2 JARHUAJPERANI

### ¿AMBE ARHIKUEKASĪNI?

Temungurhiriicha engaksĭ jarhuajperajka, ĭsĭisĭndi-ksĭ eska kopilotu ka pilotu ma engaksĭ tsimarhani ma lugari jimbo uĕkajka niĕrani. Imani ambeksĭ eratsesĭndi ambe enga tsimarhani marhuakuaua-ka, asta jiĕni jamberi enga problema ambe ja-rhajka.

**BIBLIERI KARAKATA:** “Nóteruksĭ tsimaniuatia sino solu máechakua kuerpu” (Mateu 19:6).

“Temungurhiriichaksĭ jatsisti para jarhuajperani paraksĭ úni sĕsi irekani” (Christopher).

### ¿ANDISĪ JUKAPARHAKUE?

Engaksĭ temungurhiriicha no jarhuajperaska, jiĕni engaksĭ uandanhiateechani jatsiauaka, imeecha-ksĭ mismu ueenaati arhirperani enbesi deksĭ sĕsi peentani problemani ka tátsekua inde problema uaati sĕnderu k'ĕni.

“Para temungurhiriicha jukaparhakuesti ja-rhuajperani. Engachi juchiiti acheeti jingoni no ja-rhuajperapiringa, ĭsĭĭpiringachi eska tsimani k'ui-ripuecha engaksĭ máрку irekani jaka, peru engaksĭ no újka pakatperani néna úni imani ambe enga ju-kaparhakueka” (Alexandra).

### ¿AMBEJTSĪ UAA ÚNI?

#### EXE JE NA ENGJTSĪ JÁSĪIKA

- ¿Eratsesĭntsĭ eska sentabu engajtsĭ andajka chĕrijkueska?
- Parajtsĭ sĕsi p'ĭkuarherani, ¿uĕtarhinchasĭntsĭ eska chaari uarhiiti o acheeti no jauaka?
- ¿Nójtsĭ pájperasĭni chaari uarhiitiiri o acheetii-ri parienticha jingoni nájkirukaksĭ imeecha sĕsi pájperajka?



Engajtsĭ jarhuajperaska, ĭsĭĭuakajtsĭ eska pilotu ka kopilotu engaksĭ májku lugari jimbo uĕjka niĕrani.

### IIRI AMBE UANDONTSKUARHI JE TEMUNGURHIRI

- ¿Ambe ka ambechi úsĭni sĕsi úni temungu-rhiri?
- ¿Ambechi úpirini sĕnderu sĕsi úni?
- ¿Ambechi uaa úni parachi sĕnderu sĕsi ánci-kuarhini?

### KONSEJUECHA

- Eranhaska je eska temungurhirikua ĭsĭiska eska ch'anakua ma engaksĭ tsimani ekipuecha jarhajka. ¿Ambejtsĭ úpirini úni parajtsĭ tsima-rhani májku ekipurhu jarhani ka no táchani?
- Enbesi dejtsĭ eratseni jarhani nénajtsĭ uaa chá andani, eratsi je nénajtsĭ uaa *tsimarhani* an-dani.

“No arhiati né enga rasoni jatsiaka. Ambe enga jukaparhakueka, jindeesti eska temungurhiri sĕsi pájperaaka ka eskaksĭ máрку jauaka” (Ethan).

**BIBLIERI KARAKATA:** “No solu pendienti páni para chĕjkumindu sĕsi uĕrani, sino ĭstu pendienti páni para máteruecha” (Filipusĭ 2:3, 4).

## 3 JANHANHARPERANI

### ¿AMBE ARHIKUEKASINI?

Temungurhiriicha engaksí janhanharperajka, pendientiksí pájperasíndi, nájkirukaksí no májkueni era-tseaka. *Libru Diez claves para transformar tu matrimonio*, uandasíndi: “I járhati temungurhiriichaksí no uandasíndi eska jatsiska para meru ísí úkuarhini eskaksí iicha na eratsejka. Sánderu sési, uandontskuarhesíndiksí néna sési peentani problema ma. Janhanharhikua jingonksí kurhachperasíndi ka imani ambeksí úsindi enga tsimarhani marhuakuauaka”.

**BIBLIERI KARAKATA:** “Ima enga uékpíjka, [...] no uékasíndi imeeri ambejku” (1 Korintu 13:4, 5).

“Para ji, janhanharhini juchiiti uarhiitini arhikuekasíndi eskani jukaparharaaka ka no imani ambe úni enga no sési p’ikuastaaka o enga uaaka eskachi nóteru sési pájperaakia” (Micah).

### ¿ANDISÍ JUKAPARHAKUE?

Engaksí temungurhiriicha no janhanharperajka, úpirindiksí ueenani arhinchperani, teresmarperani ka no sési p’ikuastperani. Imeecha engaksí familiecheeri ambe exejka, uandasíndiksí eskaksí ini ambe úsína ima temungurhiriicha engaksí níarájka diborsarikuarhini.

“Engajtsí teresmarhuparini arhiska ambe ma chaari uarhiitini parajtsí no sési p’ikuastani, uaati eska ima ísí p’ikuarheraaka eska no ma ambe jukaparhaska ka nóteruksíni mintsikaatia” (Brian).

### ¿AMBEJTSÍ UAA ÚNI?

#### EXE JE NA ENGAJTSÍ JÁSIIKA

Eratsenta je ambe engajtsí uandontskuarheka chaari uarhiiti o acheeti jingoni últimu semana jimbo ka na engajtsí kámaka. Tátsekua mókuanta je arini kurharhikuechani:

- ¿Namuni xanharijtsí arhinchaski ka namuni xanharijtsí sési jásí ambe arhiskí?
- ¿Nénajtsí xarhatakuski eskajtsí janhanharhiska?



Ísí eska sementu na mátaajka tabikii-chani, janhanharperakua úsindi eskaksí temungurhiriicha máрку jauaka.

### IIRI AMBE UANDONTSKUARHI JE TEMUNGURHIRI

- ¿Náki uandakuecha ka úkuecha úsini eskachi ísí p’ikuarheraaka eskachi janhanharperasínga?
- ¿Náki uandakuecha ka úkuecha úsini eskachi ísí p’ikuarheraaka eskachi no janhanharperasínga?

### KONSEJUECHA

- Tsimarhani kara je tanimu ambe engajtsí uékapi-ringa eska chaari acheeti o uarhiiti úpiringa para xarhatani eskaksíni janhanharhisínga. Exea je listeechani ka jánguarhinta je úni ambe enga máteru uéjka.
- Lista ma ú je ima amberi engajtsí tsitijka chaari uarhiitiiri o acheetiiri ka arhi je na engajtsí xáni jukaparharajka.

“Janhanharhini juchiiti acheetini arhikuekasíndi eskani úkuecha jingoni xarhatakuaka eskani jukaparharasínga ka eskani uékasínga eska sési p’ikuarheraaka. No uétarhisíndi k’éri ambe úni para xarhatani eskachi janhanharperasínga, ménichani sapichitu ambe jingontku sési jarhasíndi” (Megan).

Sánderu jukaparhakua ambe, jindeesti eska chaari uarhiiti o acheeti exeaka eskajtsí janhanharhisínga ka no eskajtsí chájku ísí exeaka eskajtsí janhanharhisínga.

**BIBLIERI KARAKATA:** “Mintsita jingoni p’amojpera je [...], ka sési kámbera je ka nójtsí teparakuarhitsperani, sino kaxumbitsperani ka no ikiatsperani” (Kolokasi 3:12).

# 4 PUÁTSPERANTANI

## ¿AMBE ARHIKUEKASĪNI?

Puátsperantani arhikuekasĭndi no kasu úni ima ambeeri engachi úminhaaka ka eskachi no jámaa-ka jatanhetspini. I ambe *no* arhikuekasĭndi eska inde ambe engachi úminhaka no k'éri ambeeska o ísĭ úni enajki no ma ambe úkuarhi.

**BIBLIERI KARAKATA:** “Tekaatsperanta je ka puátsperantani enga nema jatsika arhijperakua máteruni jingoni” (Kolosasi 3:13).

“Engari xénchajka nemani, nóri imani ambe exesĭnga enga no újka sési úni, sino na enga xáni jánguarhintajka para sési úni ambe ma” (Aaron).

## ¿ANDISĪ JUKAPARHAKUE?

Jatanhetspini uaati eskajtsĭ p'amenchaaka ka no sési p'ikuarherani ka ístu eskajtsĭ nóteru sési pájperaakia temungurhiri.

“Ma xanharirini juchiiti acheeti kánikua no sési p'ikuastaspti ambe ma jimbo enga úpka ka arhisptirini eskani puákuntapiringa, nájkirukani kánikua úkua jukanchapka, puákuntaspka. Ambe engantkuni p'amondakuarhijka, jindeesti eskani no sóntku ísĭ úpka. Engani sóntku ísĭ úpiringa, nóchi xáni ióni no sési japiringa temungurhiri” (Julia).

## ¿AMBEJTSĪ UAA ÚNI?

### EXE JE NA ENGAJTSĪ JÁSĪIKA

Eratsi je arini ambe enga chaari uarhiiti o acheeti imani ambe uaka engaksĭni no sési p'ikuastaaka:

- ¿Sóntkujsĭ no sési exesĭni ambe ma?
- ¿Uétarhisĭni eskaksĭni arhiaka eskajtsĭ puákuntaaka ojtsĭ uaa nomasi mirikurhini?



Puákuntani nemani ísĭisti eska pátani jima enga kurhupeni jaka.

## IIRI AMBE UANDONTSKUARHI JE TEMUNGURHIRI

- ¿Na xánchi ióndasĭni puátsperantani?
- ¿Ambechi uaa úni parachi sóntku puátsperantani?

## KONSEJUECHA

- Engaksĭni chaari uarhiiti o acheeti no sési p'ikuastaska, asĭ eratsi je eska uékani ísĭ úska.
- Kurhanguku je chaari uarhiitini o acheetini, miánta je eskachi “iáminduecha mámaru ambe jimbo pekadu úsĭnga [o no sési ambe úni]” (Santiago 3:2).

“Sánderu fásiliisĭndi puátsperantani engachi tsimarhani kulpa jatsijka, joperu sánderu úkua ju- kasĭndi enga májku kulpa jatsijka. Paraka nema puátspentaaka, jatsisti para kánikua kaxumbitiini” (Kimberly).

**BIBLIERI KARAKATA:** “Jánguarhinta sóntku sési peentani ambe ma” (Mateo 5:25, TNM).

Jatanhetspini uaati eskajtsĭ p'amenchaaka ka no sési p'ikuarherani ka ístu eskajtsĭ nóteru sési pájperaakia temungurhiri

# 5 UANDONTSKUARHENI SAPIICHA JINGONI

## ¿AMBE ARHIKUEKASINI?

Sési uandontskuarheni sapiicha jingoni, úsindi eskaksi taatiicha ka sapiicha uandaaka ambe engaksi era-tsejka ka p'ikuarherani.

## ¿ANDISI JUKAPARHAKUE?

Tumbi sapichu ma jingoni uandontskuarheni úpirindi úkua jukani. Libru ma uandasindi eska engaksi sapiicha sapirhajka, iámu ambeksi aianguasinga taatiichani, joperu engaksi tumbi sapirhatiijkia, nóteruksi xáni uandontskuarhekuasindia ka taatiichaksi nóteru mítesindia ambe engaksi eratsejka ka p'ikuarherani. Joperu taatiicha, así eratsi je eskajtsi no uaaka uandontskuarheni chaari sapiicha jingoni, imeechaksi iásisi úetarhinchajti eskajtsi uandontskuarheaka imeecha jingoni.

## ¿AMBEJTSI UAA ÚNI?

Jiáni uandontskuarheku je chaari sapini enga ima uékaaka. No arhiati nájkirukajtsi iauani chúrikua jamberi uandontskuarheaka.

“Ménichanchi uékapiringa ísi arhiani sapiichani: ‘Chúskutaskachi májku k'éri jarhani ka iásiri uékasini uandontskuarheni’. Joperu, ¿néna uaa ma ísi uandani enga jiániuaka enga sapi ma uékajka ueenhekuarhini? ¿No indeni ambechisi uékajki taatiicha?” (Lisa).

“Tsitisinga xarhentkuni k'uini, joperu ménisi, te-rujkani chúrisi sánderuni sési uandontskuarheska ju-chiiti tumbi sapirhatiicha jingoni” (Herbert).

**BIBLIERI KARAKATA:** “Así nema jirinhakuarhie solu indeni ambe enga para imajkumindu sési uéaaka sino ambe enga jarhuataaka máteruntu” (1 Korintu 10:24).

Así máteru ambe eratseni ja je. Taati ma uanda-sindi: “Ménichani engajtsini juchiiti sapiicha uandontskuarhechini jarhajka, ji máteru ambe eratseni jarhasin-ga ka imaksi kuenta íntskuarhesindi”.

Engajtsi chájtu ísi újka, páta je telebisionini ka máe-kandu jurajku je selularini o máteru aparatu ambe ka kurhajcha je chaari sapini ka ísijtsi xarhatakuni jauaka eskajtsi jukaparharasinga ambe engaksini aianguni jaka.

“Uétarhisindi eskaksi juchaari uájpeecha míteaka eskachi pendiente pásinga na engaksi p'ikuarhinhejka. Engachi no ísi úska, imajtsini jarhariati ka máteru ne-manksi arhiati para jarhuataani” (Maranda).

“Así jukari uandanhia je ni sikiera jiáni engaksi chaari uájpeecha no sési jási ambe uandaaka” (Anthony).

**BIBLIERI KARAKATA:** “Kurhandi je sési ambe engak-sini arhini jaka” (Lukasa 8:18).


**Jánguarhi je na uéjki jatini uandontskuarhekuani.** Ménichani tumbiichaksi jiáni tsitisindi uandontskuarheni taati jémbeecha jingoni engaksi sési p'ikuarherani jarhajka.

“Jucha jiáni sánderu sési uandontskuarhesinga engachi nirani jarhajka nani. Jimbokachi máekanduechani uaxakatini jarhasinga ka engachi no eratperani jarhajka úsingachi sánderu sési uandontskuarheni” (Nicole).

Ístuchi jiáni uaaka uandontskuarheni engachi t'ireni jauaka.

“Engachi senarini jarhajka, iáminduechachi uandan-tasinga na engajtsini nicheka ima jurhiatikua. I ambe úsindi eskachi máрку jauaka ka miátantasindijsini eskachi no jatsiska para jandiajku orhepani uérakuani uandanhiateechani” (Robin).

**BIBLIERI KARAKATA:** “Jorhengarhi je iáminduecha sóntku kurhandini, peru ióndantsi mókukuarhini” (Santiago 1:19).



Uandontskuarheni chaari uájpeecha jingoni, ísíisti eska puenti ma enga újka eskajtsi máрку jauaka imeecha jingoni.



# 6 JURHIMBERANTAANI SAPIICHANI

## ¿AMBE ARHIKUEKASĪNI?

Jurhimberantaani sapiichani, arhikuekasĭndi arhistakuani, jorhendaani ka mĕnichani ĭsĭ, arhiani sapiichani eska ambe engaksĭ ũka no sĕsĭ jarhaska. Peru, ĭstu jindeesti ambakiti p'indekuechani jorhendaani paraksĭ ambakiti ambe erakuni ũni.

## ¿ANDISĪ JUKAPARHAKUE?

Arini ũltimu uĕxurhiniicha jimbo, taatiichaksĭ nŕteru xĕni jurhimberantaasĭndi uĕjpeechani, jimbo-kaksĭ chĕsinga eskaksĭ imeecha ĭsĭ p'ikuarheraaka eskaksĭ no ma ambe jukaparharaska. Joperu ambakiti taatiichaksĭ jorhendaasĭndi uĕjpeechani ambe engaksĭ uaaka ũni ka ambe nŕmbe ka arhistakuasĭndiksĭ nĕna engaksĭ uaaka ĭsĭ ũni.

“Sapiichaksĭ uĕtarhinchasĭndi mĭteni ambeksĭ uaa ũni ka ambe nŕmbe, para engaksĭ na k'ĕraakia ũnksĭ ambakiti ambe erakuni. Engaksĭ no ĭsĭ ũska, niĕraatikĭsĭ no sĕsĭ uĕranchani, ĭsĭuatiksĭ eska barku ma engu no jukajka timoni: tĕmisĭksĭ niuati ka no sĕsĭ nikuauati” (Pamela).

## ¿AMBEJTSĪ UAA ũNI?

ĭsĭ ũ je eskajtsĭ na uandaaka. Engaksĭni chaari sapi no kurhajchaska, arhi je eska no sĕsĭ nikuaka ka engaksĭni kurhajchaska, felisitari je.

“Jimboka ĭĕsĭ nŕteru xĕni kurhandiranhasĭngia, mĕntkisĭ felisitariuasĭngu juchiiti uĕjpeechani engajtsĭni kurhajchajka. Ka ĭsĭ, sĕnderujtsĭni kurhajchasĭndi engani jurhimberantaajka” (Christine).

**BIBLIERI KARAKATA:** “Jimboka ĭĕmĭndu ambe engu ma k'uiripu jŭskaaka, ĭndeni ambemĭndu p'ikuntaati” (Galasia 6:7).

**Kurhangukua je.** Engajtsĭ jurhimberantaaka chaari sapini, exe je na engu xĕni jatiriika, ambe engu xĕni ũjka ũni ka na engu xĕni no sĕsĭ ũka. Sĕno mĕntkisĭ, jĭĕni jurhimberanhantasĭndi nema engu no sĕsĭ ambe uaaka. Pori ejemplu, engu chaari sapi no ĭsĭ ũraaka selularini eska chĕ na arhiaka, uaakajtsĭ arhini eska nŕteru xĕni ũraakia ma tiempu. Joperu jĕnguarhinta je no ĭkiani ĭsku ambe ma jimbo.

“Mĕntkisĭ, jĕnguarhintasĭngu exeni sinirini juchiiti sapi uĕkani no kurhajchaska o solu jimboka no ũska sĕsĭ ũni ambe ma. No mĕjkueniisti jurhimberantani nemani jimboka no kurhandisĭngu ka eska jarhuatani kurhanguni eska no sĕsĭ ũska” (Wendell).

**BIBLIERI KARAKATA:** “Taatiicha, asĭ ĭkiataa je chaari sapiichani paraksĭ ima no kŕmu p'ikuarherani” (Colosenses 3:21, TNM).

**Sĕsĭ kaa je.** Engajtsĭ uĕkperakua jingoni jurhimberantaaska chaari sapiichani, ĭchaksĭ exeati ka uĕkaatikĭsĭni kurhajchani ka jorhenguarhiatikĭsĭ ima amberi engaksĭ no sĕsĭ ũka.

“Engu juchaari sapi no sĕsĭ ueengu ambe ma, mĕntkisĭchi arhisĭreengu eskachi sĕsĭ p'ikuarherasĭreengu ambakiti ambe jimbo engu ũpkia ka eska engu jĕnguarhintapiringa sĕsĭ peentani imani ambe engu ũpka seguiripiringa ambakiti k'uiripu mĕni ka eska jucha jarhuatapiringa” (Daniel).

**BIBLIERI KARAKATA:** “Ima engu uĕkpijka, tekaantasĭndi ka sĕsĭ ũtspini” (1 Korintu 13:4).



Jurhimberantaani sapiichani jarhuataasĭndi, ĭsĭ eska timoni na jarhuatajka barkuni ma paraka jimeesĭsĭ niuaka engu jatsika para nirani.

# 7 AMBAKITI JÁNGUECHANI JORHENDAANI

## ¿AMBE ARHIKUEKASÍNI?

Jukaparhakuesti ambakiti jánguechani jatsiani, jimboka jarhuatasínga k'uiripuni ma paraka uaaka sési irekani. ¿Chá jánguarhintasíni jurhimitku jámani? Enga ísíika, seguru eskajtsí jarhuatauaka chaari sapiichani paraksí májkueni jámani.

K'uiripu ma enga ambakiti jánguechani jatsiajka, ístu ánychikuarhiriisíndi, májkueni kaasíndi íámínduechani ka kurhangutspisíndi ka sánderu fásiliisíndi ini ambe jorhenguahini enga ma sapichku jarhajka.

**BIBLIERI KARAKATA:** “Jorhenda sapini náki jin-deeski ambakiti xanharu, nájkiruka jatiriuakia no jurajkuati indeni xanharuni” (Proverbios 22:6).

## ¿ANDIKSÍŠÍ JUKAPARHAKUE?

Ambakiti jánguechaksí kánikua jukaparhakuesti íásí enga xáni teknolojia ambe jaka. Karyn enga sapiichani kaajka, uandasíndi: “Engaksí juchaari sapiicha selularichani úraajka ka máteru járhati aparatuechani, úpirindiksí na uéjki jatini no sési jásí ambe exeni o kurhaani. Úpirindiksí juchantsíni jingoni uaxakatini jarhani ka no sési jásí ambeksí exeni jarhani”.

**BIBLIERI KARAKATA:** “Imeecha engaksí eratsekua jukaka [...] p'índes[tiksí] eratseni paraksí úni m'íteni ambe enga jindeeka ambakiti ambe ka ambe enga no sésiika” (Ebreu 5:14).

Sési uandajpini ístu jukaparhakuesti. Pori ejemplu, ué-tarhisíndi arhipini “pori fabori” ka “diosmaiamu” ka pendiente páni máteruecha jimbo, ka i ambe tsínchexatiia, jimbokaksí k'uiripuecha sánderu exeni jarhasínga selulariichani o tableteechani ka eska k'uiripuechani kurhajchaani.

**BIBLIERI KARAKATA:** “Eskajtsí chá na uékajka eskaksíni kámaaka k'uiripuecha, ístu kaa je chá imeechani” (Lukas 6:31).

## ¿AMBEJTSÍ UAA ÚNI?

Méntku arhia je na engajtsí jásí k'uiripueka. Exenhastia eskaksí uánikua tumbi sapirhatiicha nóksí níatásínga

ísku jándikua ambe, jimbokaksí taati jémbeeche arhiasínga eska inde ambe no sési jarhaska.

**KONSEJU:** Notisiechani úraa je engaksí nótki xáni íóniika engaksí uéraka parajtsí ambakiti ambe jorhendaani chaari uájpeechani. Pori ejemplu, engajtsí kurhaaska eska no sési kámberanhaska kurhuhperakua jimbo, uaakajtsí arhini: “¿Xáni no sési! ¿Amberi jimbo uandapirini eskaksí k'uiripuecha ísí jámasínga?”.

“Parakaksí sapiicha erakuaka ambakiti ambe úni, orhetaksí jatsisti para m'íteni ambe enga sési jaka ka ambe nómbé” (Brandon).

**Jorhenda je chaari sapiichani paraksí pendiente páni máteruecha jimbo.** Asta sánderu sapirhatiichaksí uaati jorhenguahini pendiente páni máteruecha jimbo ka arhipinksi “pori fabori” ka “diosmaiamu”. Libru *Parenting Without Borders* (Padres sin fronteras), arhisíndi: “Engaksí sapiicha cuenta ítskukuarhejka eskaksí no imajkue-ska, eskaksí familiarhu ma jarhaska, eskuelarhu ka ireta ma jimbo, sánderuksí uékaati jarhuataani máteruechani”.

**KONSEJU:** Úraa je ambe ma chaari sapiichani parajtsí jorhendaani eska jukaparhakueska jarhuataani máteruechani.

“Engaksí chaari sapiicha jarhuajpejka k'umanchikuarhu, nóksí úkua jukanchasíndi engaksí na jandiajku irekani jarhajkia, jimbokaksí p'índesíngia úni ambe enga uétarhijka” (Tara).



Ambakiti jánguechaksí ísíis-ti eska brujula ma enga jarhuataaka chaari sapini, imani xanharu jimbo nirani enga sési jaka.

# 8 AMBAKITI EJEMPLU ÍNTSPINI

## ¿AMBE ARHIKUEKASĪNI?

Ambakiti ejemplu ma íntspini, arhikuekasíndi ísí úni eska ma na jorhentpijka. Taati ma no uaati erokuarhini eska uájpa méntkisí jurhimbitku uandantaaka enga ima arhiska eska uandaaka eska no jarhaska, nomasi para no kurhakuarhini.

“Uánikua k’uiripu uandasíndi: ‘Ú ambe engani uandajka ka no ambe engani újka’. Joperu inde ambe no marhuasíndi sapiicha jingoni. Sapiichaksí íámindu ambe exesíndi ka jorhenguarhisíndiksí, ísíístiksí eska esponjeecha engaksí íámindu ambe antsitajka. Engachi jucha jorhendaaska ambe ma ka máteru ambe úni, imeechaksí exeati ka arhiatijtsíni” (David).

**BIBLIERI KARAKATA:** “T’u engari jorhentpijka eska no sésiiska sipatspeni, ¿andiresí t’ujtu sipatspejki?” (Roma 2:21).

## ¿ANDISÍ JUKAPARHAKUE?

Sapiichaksí sánderu ísí jámasíndi eska taati jémbeecha ka eska imeecha engaksí jingoni eskuelarhu jámajka, asta jiáni engaksí na tumbi sapirhatijkia. I ambe arhikuekasíndi eska chá engajtsí taatiika, chájtsísí uaaka ambakiti xanharu jimbo paani, joperujtsí jatsiska para chaari ejemplu jingoni jorhendaani.

“Úpiringachi uánikua xanhari arhiani ambe ma juchaari sapiichani ka no seguru jarhani eskajtsíni imeecha kurhajchaxaka, joperu engachi no ísí úska ambe ma eskachi na uandaaka, jirejiresíjtsíni arhiati. Iámindu ambeksí exeni jarhasíndi engachi xáni újka, nájkirukaksí no xarhatajka” (Nicole).

**BIBLIERI KARAKATA:** “Ima k’uiripu enga Tata Diosíiri jánhaskakua jatsika, [...] no ísku apariísti” (Santiago 3:17, TNM).

## ¿AMBEJTSÍ UAA ÚNI?

**Kurhamarhikuarhi je:** “¿Néna kámasíni juchiiti uarhiitini o acheetini ka juchiiti sapiichani? ¿Na járhati programeechani exeasíni? ¿Na járhati amigueechani jatsiaski? ¿Pendiente pásini máterueechani jimbo?”. ¿Uékapirintsí eskaksí chaari sapiicha májkueni jámapiringa eska chá?

“Ni juchiiti acheeti ni ji, arhiajki juchaari sapiichani eskaksí imani ambe uaaka engachi jucha no újka” (Christine).

**Kurhakua je máterueechani eskaksíni puáchentaaka.** Sapiichaksí mítesti eskaksí taatiicha no perfektueska. Ísí jimbo, engajtsí arhiska chaari uarhiitini o acheetini o chaari sapiichani eskaksíni puáchentaaka, jorhendaani jauakajtsí eska jukaparhakueska jurhimbitku jámani ka kaxumbitiini.

“Engachi no sési uaaka ambe ma jatsiskachi para jiókuarhini ka kurhajkuarhini eskajtsíni puáchentaaka, jimboka engachi no ísí úska, juchaari sapiichaksí no jorhenguarhiati ísí úni” (Robin).

“Juchaari sapiichaksí imani ambe uaati engachi jucha újka, ísí jimbo kánikua jukaparhakuesti juchaari ejemplu, jimbokaksí indeni ambesí exeni jarhajti. Juchaari ejemplu, ísíísti eska libru ma enga méntku p’irakukata jarhajka para jorhentpini chúrikua ka jurhiakua” (Wendell).



¿Uékapirintsí eska chaari sapi jimeesísi nipiringa engacha nírani jaka?

# 9 MÍTENI NEESKIRI T'U



Mítene neeskiri,  
jarhuataatiken  
orhepani uéra-  
kuni náki uéjki  
ts'éjkukua ma.

## ¿AMBE ARHIKUEKASINI?

Ambe enga xarhatajka neeskiri t'u, no solu jin-deesti chiiti nombri, o na engari jáxeka, sino chiiti ambakiti jánguecha, ambe engari jakajkujka ka na engari jásiika.

## ¿ANDISI JUKAPARHAKUE?

Engari sési mítetini jarhajka neeskiri t'u, imani amberi úsinga engari exejka eska sési jarhaska ka nóri jurajkusinga eskaksini máteruecha arhiaka ambe engari uaka.

“Uánikua k'uiripuechaksí ísiisti eska plastikueri monuecha engaksí tiendeecharhu jarhajka, nóksí jamberi úsindi uandani náki xukuparhakuaksí ju-kaa” (Adrian).

“Jorhenguarihaska kuájpini imani ambe enga sési jaka nájkiruka no fásiliika ísí úni. Míteska né engaksí meru juchiiti amigueka, jimbokani míteska

na engaksí jásiika ka na engani jámajka engani imeecha jingoni jarhajka” (Courtney).

**BIBLIERI KARAKATA:** “Asteru jáma je terukukuan-tani parhakpini anapuechani, sino ménderueni jáma je” (Roma 12:2).

## ¿AMBERI UAA ÚNI?

Parari mítene neeskiri *íasí* ka nári jási k'uiripu *uéka-sini jindeeni*, exe ambe engari újka úni, ambe nómba ka ambe engari jakajkujka. Uaakari arini ambe kurhamarhikuarhini.

**Ambe enga ma újka sési úni:** “¿Ambe ka ambe jo-rhenaski úni? ¿Ambe sándaruni sési úsini? ¿Jo-rhenaski p'ingukuarhini? ¿Ima jandora níarasini engani arinhajka, áchikuarhiriiski o intsímpi-tiini?”.

**KONSEJU:** Engari no míteka na engari jásiika, arhia chiiti taatiichani o ambakiti amiguni ma es-kaksini jarhuataaka.

**BIBLIERI KARAKATA:** “Eskajtsí mándani arhini exekuarhiaka na engajtsí jámani jaka, parajtsí úni mándani arhini sési p'ikuarherani chaari ambe jim-bojku ka no máterueri ambe jimbo” (Galasia 6:4).

**Ambe enga ma no újka sési úni:** “¿Ambe uaa úni parani sándaruni ambakiti k'uiripu máeni? ¿Na jatini sándaruni tsitisini imani ambe úni enga no sési jaka? ¿Na jatini sándaruni uétarhinchasini parani p'ingukuarhini?”.

**BIBLIERI KARAKATA:** “Engachi uandajka eskachi nómba pekadu jatsiska, jucha jandajku k'arhaku-rhisínga [o enganiarikuarhini]” (1 Juanu 1:8).

**Ambe enga ma jakajkujka:** “¿Náki juramukue-chani kurhajchaasini, ka andi? ¿Jakajkusini Tata Diosini? ¿Néna míteski eska jarhaska? ¿Ambe ka ambe exesini eska no sési jarhaska, ka andi? ¿Ambe eratsesini eska úkuarhiaka sán-deru orhepani?”.

**BIBLIERI KARAKATA:** “Chiiti eratsekuakini kuida-rini jauati ka jánhaskakuakini níaraati kuájcha-kuni” (Proverbios 2:11).

# 10 MINTSINHARHIKUENI



Kurhajchaani chiiti taatiichani ísíisti komueska sentabu kuantu-pini bankurhu ka méntkisíri íntspintani. Engari sánderu responsabliiska sánderuksíni mintsikaati ka sánderuksíni ué-kaati kuánetaní.

## ¿AMBE ARHIKUEKASÍNI?

Ima enga mintsinharhikuejka, janhanharhíasíndi juramukuechani, úsíndi ambe enga aiatspejka ka méntkisí jurhimbítu uandantasíndi. Enga ísí újka, imeeri taatiicha, amiguecha ka imeeri patroniicha mintsinharhisíndiksí.

## ¿ANDISÍ JUKAPARHAKUE?

Paraksíni sánderu jurajkuni úni ambe ma, jatsiskari para xarhatani eskari mintsinharhikueska.

“Parakaksíni chiiti taatiicha sánderu mintsikaa-ka, jatsiskari para eratsekua jukarini ka méntkisíri úni ambe engaksíni arhiaka ka no solu jíántku engari imeecha jingoni jauaka” (Sarahi).

**BIBLIERI KARAKATA:** “Ts’éjkukuarhi je chájkumin-du” (2 Korintu 13:5).

## ¿AMBERI UAA ÚNI?

Ari konsejuechaksíni jarhuataati paraksíni chiiti taatiicha uaka ménderu mintsikani o eskaksíni sánderu mintsikaaka.

**Así chkuandera.** Engari chkuanderaska, k’uiripuechaksíni nóteru mintsikaatia. Joperu engari jurhimbítu uandantaska ka jurhimbítu jámani ka sánderu jíáni engari no uaka sési úni ambe ma, máteruechaksíni níaraati mintsikani.

“No úkua jukasti jurhimbítu uandantani engari t’u sési uéranchaaka. Joperu engari jurhimbítu uandantaska nájkirukari no sési uéranchaaka inde ambesí újti eskaksíni máteruecha mintsikaaka” (Caiman).

**BIBLIERI KARAKATA:** “Uékasíngachi iámindu ambe jimbo sési jámani” (Ebreu 13:18).

**Responsabliini.** Estados Unidos, exenhasti eska 78 % ima k’uiripuecheri engaksí ánychikuarhita íntspijka, exesíndiksí eska “tanimu ambeeri enga sánderu jukaparhakueka para ma ánychikuarhita íntsi-nhani”, jindeeska eska ma responsabliuaka. Jorhenguahini responsabliini iásí, kánikuakeni jarhuataati jíáni engari k’ériuakia.

“Juchiiti taatiichaksí kuenta íntskukuarhesíndi eskani responsabliiska engajtsíni no méntku arhini jarhajka ambe engani jatsika para úni. Engani ísí újka imeechajtsíni sánderu mintsikasíndi” (Sarah).

**BIBLIERI KARAKATA:** “Mintsikaparini eskarini janhanharhiaka [...] seguru jarhaska eskari sánderu jamberi uaka ka eska engakeni arhikia” (Filemoni 21).

**Tekaantskua jatsi.** Ma sóntku úsíndi exeni eska tumbi ma k’éni jarhasínga, joperu tiempu pásíndi paraksí máteruecha exeni eskaksí tumbiicha eratsekua jukarixakaia ka responsabliínskí.

“Nóri uaka úni eskaksíni chiiti taatiicha o máteruecha sóntku mintsikaaka, joperu engari responsabliuaka, imeechaksíni sánhani arhiati mintsikani” (Brandon).

**BIBLIERI KARAKATA:** “Ka ísí tekaantani jarhani iáminduecha jingoni” (1 Tesalonika 5:14).



# 11 ÁNCHIKUARHIRIINI



Ánchikuarhini  
ísíisti eska mén-  
tku ejersisiu úni  
jarhani: ma-  
rhuachiatikini  
iási ka ístu sán-  
deru orhepani.

## ¿AMBE ARHIKUEKASĪNI?

Ima k'uiripu engá ánychikuarhirijka, tsitisindi ánychikuarhini para ima kéndakuarhini ka para jarhuataani máteruechani, nájkiruka ima ambe engá ánychikuarhijka no xáni k'éri ambeuaka.

## ¿ANDISĪ JUKAPARHAKUE?

Nájkirukachi no tsitijka, iáminduechachi jatsiaska responsabilidadiichani. Ístu, iási kánikua marhuasindi ánychikuarhiriini, jimboka uánikua k'uiripu nóteru tsitisíngia ánychikuarhini (Eclesiastés 3:13).

“Engani kánikua ánychikuarhijka sési p'ikuarherasínga, ísí jimbosini sándery tsitijka ánychikuarhini. Ístu, engari ánychikuarhirijka máteruechaksini kánikua sési exesindi” (Reyon).

**BIBLIERI KARAKATA:** “Iámindu ambe jimbo engá jánguarhinhantajka kóntperatechaksí jarhasindi” (Proverbios 14:23).

## ¿AMBERI UAA ÚNI?

Ari konsejuechaksini jarhuataati parakari tsitiaka ánychikuarhini.

**Jorhenguarhi sési úni ambe ma.** Así máteru ambe eratseni ja engari ambe ma úni jauaka k'umanchikuarhu, eskuelarhu o ánychikuarhitarhu, exe nénari uaa sándery sési úni o sándery kókuani. Engari sándery sési úska chiiti ánychikuarhitani, sándery sési p'ikuarheraaka.

**BIBLIERI KARAKATA:** “Exeskiri k'uiripuni ma engá sési újka imeeri ánychikuarhitani, reiicheeri orhepani jimbo níaraati jarhani ka no né uéjki k'uiripuni jingoni” (Proverbios 22:29).

**Pendenti paa máteruechani.** Sáno méntkisí engari újka ambe engari arhinhajka, máteruechantu marhuakuasindi. Pori ejemplu, engari újka ambe engari arhinhajka k'umanchikuarhu, jarhuatani jarhasíngari iámu familiani.

**BIBLIERI KARAKATA:** “Sándery sésiisti intsímpini, ka eska intsímbinhani” (Ukuecha 20:35).

**Jánguarhinta sándery ambe úni.** Así xántku ú eskari xántku kurhaminhaaka. Jánguarhinta sándery ambe úni, ísíkeni *no nema* arhini jauati ambe engari jatsika para úni. Ísíisti eskari sándery ánychikuarhiaka, joperu no jimbokaksini máteruecha arhiaka (Mateu 5:41).

**BIBLIERI KARAKATA:** “No komu siengaksini nema uinhamarhichipiringa, sino jimbokajtsí chámindu uékasínga ísí úni ” (1 Pedru 5:2).

**No jukari ánychikuarhini.** Ánychikuarhiriini no arhiuekasindi eska ma méntku ánychikuarhini jauaka ka no mintsikuarhini. Sándery sési, ma jatsisti para sésku ánychikuarhini ka ístu mintsikuarhini.

**BIBLIERI KARAKATA:** “Sándery sésiisti mintsikuarhini sáni ka eska jukari kánikua ánychikuarhini ka ísku xáni jánguarhintani” (Eclesiastés 4:6).

# 12 JATSIKUKUARHIANI METEECHANI



Meteechaksĩ  
ĩsĩĩsti komueska  
k'umanchikueri  
planu ma. Enga-  
ri jánguarhinta-  
ska, niáraakari  
ĩsĩ úni eskari na  
eratsetini jaka.

## ¿AMBE ARHIKUEKASĨNI?

Meta ma no solu jindeesti ambe ma engachi tsitipiringa eska úkuarhipiringa. Para úni ambe engachi eratsetini jaka, uétarhisĩndi eskachi sési eratsetini ja-uaka néna úni, exeni sinchi uaa ísĩ úni ka kánikua jánguarhintani.

Máru meteechaksĩ úsĩndi máru jurhiatikuecha jimbojku úkuarhini, máteruecha mesiicha o asta uáníkua uéxurhini jimbo. Ka parachi úni kumpliriini meta ma sánduru orhepatini, uétarhisĩndi úni máru ambe engajtsĩni jarhuataaka parachi niáranĩ indeni metani kumpliriini.

## ¿ANDISĨ JUKAPARHAKUE?

Engari újka ambe engari eratsetini jarhajka, sándururi mintsinharhikuarhisĩnga, sándururi sési pájpera-sĩnga máteruecha jingoni ka sésiri p'ikuarherasĩnga.

**Sándururi mintsinharhikuarhiaka.** Engari jatsiku-kuarhiaska imani meteechani engaksĩ no xáni úkua jukaka ka ísiri úni, tátsekuari uaa sánduru k'éra

meteechani jatsikukuarhiani. Ísturi uaa orhepani uérakuani uandanhateechani, komu engaksĩni máteruecha méntku arhini jauaka eskari no sési ambe niátaaka.

**Sándururi sési pájperaaka máteruecha jingoni.** láminduechaksĩ tsitisĩndi imeecha jingoni jarhani engaksĩ mitejka ambe engaksĩ uéjka ka engaksĩ jánguarhintajka para ísĩ úni. Ístu, ma úsĩndi sánduru sési pájperani nemani jingoni engaksĩ jarhuajperajka paraksĩ úni ambe engaksĩ tsimarhani tsitijka.

**Sándururi sési p'ikuarheraaka.** Engari jatsiku-kuarhijka meteechani ka ísiri úni, sésiri p'ikuarhera-sĩnga.

“Kánikua tsitisĩnga meteechani jatsikukuarhiani, jimbokani ísĩ jatsisĩnga ambe ma parani úni. Kánikua sési p'ikuarherakuarhisĩndi engari ísĩ újka eskari na eratsetini jarhajka. Engari miántajka úsingari uandani: ‘¡Úska ísĩ úni!’” (Christopher).

**BIBLIERI KARAKATA:** “Ima enga tarhiatani exeni jarhajka, no ma ambe ikaraati ka ima enga nubeechani exeani jarhajka no ma ambe p'ikuntaati” (Eclesiastés 11:4).

## ¿AMBERI UAA ÚNI?

Parari jatsikukuarhiani meteechani ka ísiri úni, arini ambe ú.

**Erakua chiiti meteechani.** Karaa iámindu engari xáni eratsekata jatsiaka ka tátsekua ísĩ peera eskari na úpauaka.

**Exe néna engari uaa ísĩ úni.** Arini ambe ú mán-dani meta jingoni:

- Jatsiku fecha na engari jatini uaa kumpliriini.
- Kara ambe ka ambe engari uaa.
- Eratsenta ambekini úpirini ójkutani ka amberi úpirini úni parari úni orhepani uérani.

**Ueena ísĩ úni.** No uétarhisĩndi eska iámindu ambe sési jauaka parari ueenani úni ambe ma. Eratsenta ambe engari orheta jatsika para úni ka ísĩ ú. Exe ambe engari xáni úkia parari imani ambe úni engari eratsetini jaka.

**BIBLIERI KARAKATA:** “Sési nikuati imani enga áanchikuarhiriika enga sési eratsentaaka ambe enga uaa” (Proverbios 21:5).



# MÁTERU AMBE ENGA JARHUATAUAKA FAMILIECHANI

**BIBLIARHU UÁNIKUA AMBAKITI KONSEJUECHAKSĪ JARHASTI** para temungurhiriicha, taatiicha ka tumbiicha. Konsejuecha engaksĭ jimini jaka, jarhua-tasĭndijtsĭni sĕnderu sĕsi eratseni ka ambakiti ambe erakuni ũni (Proverbios 1:1-4).



Engajtsĭ uějka mĭteni sĕnderu ambe temungurhirikueri ka familieri ambe, exe je partini “Jarhuajperata para familiauecha” engu [jw.org](http://jw.org) jimbo jaka o eskaniari je kodiguni.

## BIBLIA ÍSTU MÓKUANTASĪNDI AMBAKITI KURHAMARHIKUECHANI, PORI EJEMPLU:

- ¿Andichisĭ irekani jakĭ?
- ¿Tata Diosĭiri kulpeski engachi kómu nitamakuarhini jaka?
- ¿Tsĭpitichi pakarasĭni engachi uarhijka?



Pĭmarhisingaksĭni parajtsĭ chá mismu exeni ambe engu Biblia uandajka iiri ambe ka má-teru kurhamarhikuecheeri. Exe je bideuni ¿Andisĭ uĕtarhijki jorhenguarhini Bibliaeri ambe? Exe je [www.jw.org](http://www.jw.org) o eskaniari je ini kodiguni.



Kĕsku je gratisi ini rebistani ka engaksĭ antesĭ uĕraka



Arhinta je Bibliani internetirhu; jukari 200 idiomecha jimbo jarhasti

Exe je [jw.org](http://jw.org) o eskaniari je ini kodiguni



918.2-TRS  
221027